

Dithero tsa Tirelano mo Kutlwanong

Thero ka Sontaga wa 16 morago ga moletlo waBorarobongwe, e le ka 09. 10. 2011 50/2011

Mo leineng la Modimo o e leng Rara le Morwa le Mowa o o Boitshepo!

1. Sefela sa 187/195

2. Thapelo: *Morena Jesu Kereseste Morwa wa Mong-wa-thata-tsotlhe, re a go leboga, ka o le tsogo le botshelo, ka o thusa ba ba mo tlalelong, o phutha le bahutsafadi, o gomotsa le ba ba tlhokafaletsweng. Re a leboga, ka o le Morena le wa loso, o mo go rona, le fa re tlhokafetse, re le mo lebitleng, re ntse re le mo seatleng sa gago. O re thuse ka Mowa wa gago, o re gogele mo kitsong, le mo boikanyong jwa go ikanya bopelotlhomogi jwa gago gore re gogelwe mo pholosong ka lorato lwa gago, Morena Jesu Keresete, Morepholosi. Amen.*

3. Epistolo ka fa thulaganyong ya 2 e kwadilwe mo go Baefeso 3:14-21;

Efangele ka fa thulaganyong ya 1 e kwadilwe mo go Luka 7:11-16.

4. A go ipolelwe tumelo ya bokriste!

5. Sefela sa 159/166

6. Thapelo ya mmadi wa thero.

7. Lefoko ka fa thulaganyong ya 3 le kwadilwe mo go Dilelo 3:22-33, le re: *"Ke mapelelele me ke MORENA; ke ka moo ke solofelang mo go ene." MORENA o lorato le ba ba solofelang mo go ene; o lorato le pelo e e mmatlang. Go molemo, fa motho a leta thuso ya MORENA a sa potlake. Ke se se molemo, fa monna a rwala joko a sa le monnana. A a nne a le esi, a didimetse, fa a e rwesitswe ke ene. A a ise molomo wa gagwe kwa loroleng; ka gongwe go teng se se solofelwang. Yo o mo itayang a a mo neele lesama, a kgore kgobo! Gonne Morena ga a latlhele ruri. Gonne fa a utlwisitse motho botlhoko, o tla mo tlhomogela pelo gape, jaaka a le mapelonomi a magolo. Gonne ga se gore o a kgatlhega, fa a tlhokofatsa batho, fa a ba bogisa." Amen.*

8. Thero: Phuthego e e rategang, re bala mo Kategisimeng ya rona gore Modimo o bogale jo bogolo tota, o bopa go betsa botlhe ba ba tlolang ditaolo tsa ona. Mme gape o solofetsa bopelotlhomogi mo go bone ba ba di tshegetsang. Bogale, o na le jona, bo bogolo, mme bopelotlhomogi jwa ona bo bogolo go feta bogale. Ga bo lekanngwe le sepe. Bo bogolo tota. Kana bogale bo raya losika lwa boraro, gongwe lwa bone fela. Bo a fela, mme bopelotlhomogi bo ya mo losikeng lwa sekete. Ke gore ga bo lekanngwe ka bontsi jwa jona. Ke gore ga bo fele. Bo teng ka metlha. Moporofeti o tlhalosa sentle, fa a re: **Mapelonomi le mapelotlhomogi a MORENA ga a fele, a tsoga a le mašwa mosong mongwe le mongwe.**

Moporofeti o lela ka motse wa bone, e bong Jerusalema, o hutsafetse mo go maswe ka ntlha ya tshenyego ya ona. O lelela bagagabo, mmogo le motse wa ga gabo, o o neng wa tlotliwa mo go kalo. Mme fa mouwane o nyelela phakela, fa go sa ka tsela e e ntseng jalo, motho wa Modimo o gogelwa mo boammaaruring, o senolelwa ke Mowa wa Modimo gore bopelonomi jwa Modimo bo bogolo. Ke ka ntlha ya moo fa ba ise ba felele ruri. Moporofeti ke motho wa Modimo, mmoni yo o senoletsweng thato ya Modimo, e seng ka fa mokweng wa batho, le e seng ka fa thatong ya batho, mme e le ka fa thatong ya Modimo. O gogiwa ka Lefoko la ona, Modimo o mo tlhotlheletsa lona. Go ne go ntse jalo mo moporofeting Jeremia. Ke tshwanelo gore go nne jalo le mo go rona rotlhe, bogolo mo go rona ba re tshwarisitsweng Lefoko la Modimo, gonne ke lona le le re gopotsang thato ya ona ka ntlha ya batho gore ba tshele, ba tsamaye ka fa yona. Ka Lefoko la ona Modimo o re gopotsa bopelotlhomogi jo Modimo o bo diretseng Baiseraele. Go bonala jalo mo mafelong a le mantsi a Testamente e kgologolo, jaaka mo go Ex 32:30-33:1-6. Modimo ga o a ka wa fetsa morafe, fa o ne o direla namane ya gouta, le fa o ne wa batla go dira jalo, le go dira Moše, a nne rralosika lwa morafe o mošwa. Bopelotlhomogi jwa Modimo bo ne bo sa fele, bo tsoga bo le bošwa mosong mongwe le mongwe. Le rona re tshwanetse go bua, le go kaela, le go ruta ka metlha ka ga **bopelotlhomogi jwa Modimo** mo gare ga ditshika tse re tshelang mo go tsona, rona ba re dupang madi, le dintwa, le melelo, le dintsho tsa ba ba se nang molato. Re re: "Ke mapelonomi a MORENA, fa re ise re felele ruri; Ee, mapelotlhomogi a gagwe ga a ise a

fele." Morena o re letetse gore re tlhabologe, re tlogele dipitlaganyo tse re di bonang. Kana motho mongwe le mongwe, legae le legae, phuthego ya lona, kereke ya rona, ke raya lefatshe lotlhe le tshela ka bopelonomi jwa Modimo. Ke tshwanelo gore re bo ikanye, re be re bo rate, gonne rotlhe re tshela ka jona.

Ee, re utlwile gore re tshela ka bopelotlhomogi jwa Modimo. Ka moo ke tshwanelo gore re bo rate, re bo ikanye, re bo gopole, re boele mo go jona ka metlha ka go ipobola, le go lela, le go hutsafala ka ntlha ya maleo, ka malatsi otlhe re boele mo go jona, gonne bopelonomi, le bopelotlhomogi jwa Modimo bo mo mading a ga Morwaaona. Ka moo re tshwanetse go bo rata, le go bo ikanya, re nne re kope mo dithapelong tsa rona gore Mowa o re lemose maleo a rona, le bogale jwa Modimo ka ntlha ya ona, re tle re tshabele mo bopelotlhomoging jwa Modimo, re se ka ra tshwana le Jutase yo o neeletseng Morena wa gagwe, mo bofelong a bona maleo a gagwe fela, a sa tlhola a bona bopelotlhomogi jo bo itshwarelang. Kana bopelotlhomogi jwa Modimo bo bogolo go feta tse tsotlhe, bo godimo ke raya bo godimo le ga maleo a rona, gonne Lefoko la Morena le re: "Le fa dibe tsa lona di hubitse jaaka madi, di tla sweufala jaaka semathana," Jes. 1:18. Bopelotlhomogi jwa Modimo bo bogolo, bo feta tsotlhe tse re ka di akanyang tsa rona. Le fa go ntse jalo, re tshwanetse go lemoga sentle gore bo dira ka fa thatong ya Modimo. Motho o tshwanetse go ikokobetsa, a sikare jokwe ya gagwe. Ke tshwanelo gore motho a ikokobetse, a dumelele go bediwa, le fa a itse, le fa a sa itse gore o belediwang. Jobe wa bogologolo e ne e le motho yo o neng a sa nyatsege fa gare ga batho, le fa pele ga Modimo, a o boifa, Jobe 1:1, mme morago, Jobe 42:3.5-6, a ipolela a re: "Ke buile ke se na tlhaloganyo; ka bua metlholo e e mpalelang, e ke sa e itseng. Ke ne ke utlwetse fela ka ditsebe, mme jaanong matlho a me a go bonye. Ka moo ke a inyatsa, ke a ikwatlhaya, ke le leroleng le moloreng." Go bonala sentle gore bopelotlhomogi jwa Modimo o dira sentle, o na le kgono e ntle, fa go dirafala gore nna le wena re inyatsa. Ga dirafala jalo le mo kgosing ya kwa Ninife, ya inyatsa, ya apola kobo ya yona ya bogosi, ya apara masela a boikwatlhao, yona mmogo le ba bagolo le ba bannye, ya nna mo moloreng, ya tlhaba mokgosi mo motseng wa gore ba itime dijo. Mme tota Modimo wa

bona ditiro tsa bone tsa go boa mo ditseleng tse di bosula tsa bone, wa ithibela mo petsong e o neng o ikaeletse go e ba direla, mme wa se ka wa e dirafatsa, Jona 3:6-10. Fa re ikatlhola, ga re atlholwe ke Modimo, ga re latlhwe, fa rona ka rosi, re itatlha. Mme fa re atlholwa, re watlhaiwa ke Morena gore re se ka ra atlholelwa tatlhego mmogo le lefatshe, 1 Kor. 11:31-32. Le Jeremia mo lokwalong lo lwa Dilelo a ntse a boella boipolelo jwa maleo a Baiseraele, jaaka mo felong kwa re buisang teng: "Go ikepile rona, ra se ka ra utlwa," Dilelo 3:42, le mo mafelong a mangwe a teng.

Modimo ga o rate gore go latlhege motho, le fa e le a le mongwe fela, mme o rata gore botlhe ka botlalo ba goroge mo pholosong. Ga o itumelele tatlhego ya yo o bosula, jaaka re mo utlwa a lelela motse wa Jerusalema mo go Math. 23:37. Mafoko ao a supa tota gore ke selo se Modimo o sa se rateng gotlhe-gotlhe, ke raya tatlhego ya motho. Ka moo ga o hutsafatse batho ka maikaelelo a go ba latlha, mme o rata gore ba tlabologe, ba tshele. A re itumeleleng bopelotlhomogi jo bogolo jwa ona, mme re se ka ra itsietsa ka go lora le go gopola le go ikgomotsa ka gore re ka tswelela fela mo bosuleng, ka go bua gore re ikanya bopelotlhomogi jwa Modimo. Ke jo bogolo jona. A re se ka ra bua ka ntlha ya bopeloethatha jwa rona ka go tswelela fela mo dibeng ka bomo, re re: Ga re na go fela. Nyaya, ga go a nna jalo. Ga go buiwe fano ka ga go nyatsa bopelotlhomogi jwa Modimo, le ka go o leka. A go se nne jalo! Ga go rewe se se ntseng jalo.

A re lebogeleng, re itumelele bopelotlhomogi jwa Modimo, le lefatshe, le sebaka se re tshelang mo go sona, se itsamaisa fela ka fa thatong ya sona, se re: Se tla ipaakanyetsa tsotlhe ka bosona. Ga go na sebaka, ga go na lefatshe le le ka ithusang kwa ntle ga bopelotlhomogi jwa Modimo. Re a leboga, ka Modimo o re file Lefoko la ona le le sa ntseng le re itsise gore ga re ise re felele ruri, ka Modimo o le bopelotlhomogi le rona. A re itshwareleleng mo boammaaruring jo, re bo nyorelwe ka metlha, ka nako yotlhe ya botshelo jwa rona re tshele ka Lefoko, ka go gopola gore Morwa-Modimo o re baakanyeditse tsotlhe tseo ka go re swela mo sefapaanong, le ka go tsoga mo baswing. Amen.

9. Thapelo: Re a leboga, Morena, ka o re gopotse re ntse re le mo botshwarong jwa go tshwarwa ka bosula, wa bona tatlhego ya rona, le tshenyego ya rona, wa re utlwela botlhoko, ga o a ka wa re fetsa, mme o tlile gore re pholosiwe ka go dumela mo go wena. Re a go tumisa ka ntlha ya pholoso e e tswang mo go wena. O re thuse gore re se ka ra lebala bopelotlhomogi joo, re bo itsise le ba bangwe ka metlha. Re a go leboga, Modimo o o osi ka ntlha ya bopelotlhomogi jo bo mo go Morwao Jesu Keresete, Morepholosi. Amen. Thapelo ya Morena: Rara wa rona yo o mo legodimong ...

10. Sefela sa 169/-

Kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke A. N. Ntuli (†), ka ngwaga wa 1993

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.